

Expansion di infraestructura

ORANJESTAD – Den e plan di Gobernacion ta sigui pone enfasis den mehoracion di infraestructura di Aruba. E ta inclui no solamente renobacion/mantenencia di edificio, y hiba iluminacion den tur skina di Aruba, pero tambe un mehoracion di e careteranan di Aruba. Esta construccion di camindanan nobo y mantencion di otro-

nan. E mandatario a bisa cu lo invertiendo 15 milyon florin anualmente, via di e fondo WIF. E plan pa cu careteranan ta wordo reparti segun importancia, den tres diferente tipo. Camindanan principal, esunnan cu ta conecta bario cu e camindanan principal y camindanan den e barionan. Tur e trabounan aki ta wordo reparti segun e fondo di WIF, cu excepcion di esunnan cu ta wordo financia via di e sistema di PPP. Tin un lista largo di careteranan nobo cu ta bay wordo construi y tambe esnan nobo den e diferente

barionan. Asina cuminsa cu proyecto di renobacion di un bario, e parti di caretera ta wordo inclui di biaha.

Den cuadro di e inversionnan cu ta wordo haci den infraestructura, a wordo splica cu e departamentonan concerni hunto cu conseheronan ta evaluando material nobo cu por wordo uza den p.e. careteranan. Un di e tecnologia nan cu a ricibi presentacion di dje, ta esun cu ta haci e santo duro, sin cu mester pone asfalt. E producto aki ta wordo evalua principalmente pa areanan cu ta keda den naturalesa cu no kier pa wordo dañá cu uzo di asfalt.

Un di e proyectonan grandi cu ta bay den ehecucion den e periodo aki ta Green Corridor, cual trabou ta bay wordo realisa pa e empresa Colombiano ODINSA. Ta trata di un proyecto di mas di 75 milyon dolar, cu ta encera construccion y mantencion di e area Green Corridor. E proyecto mes ta encera ampliacion di e caminda di 7



km, for di aeropuerto te cu Pos Chikito cu lo bira dobel via, pero tambe 23 km di caminda cu ta bay wordo renoba completamente y construccion di 13 km di via pa bicicleta. E trabounan prome cu GC ta encera un conexion na Seroe Thijshi pa yega Barcadera. Na momento cu esaki ta cla, probablemente

memey di aña, e trabounan di GC mes ta cuminsa. E lo tin un duracion di 30 luna mas o menos, sperando cu e lo por wordo entrega na 2016. Den cuadro di e ariba menciona, lo cuminsa na mesun momento cu preparacionnan pa construccion di Ringweg (RW3), cu su destaho lo mester tuma luga

den e proximo dos lunanan pa e trabou di construccion mes por cuminsa na 2015. Ta di spera cu tanto Green Corridor como RW3 lo ta cla pa 2017 dunando Aruba un cambio completo den conexion entre e areanan pabou y pariba y alabes permitindo un miho fluho di trafico pa e proximo 20 añanan. □